



Sophia e à muse di cuninut.

Sophia e je dute curvis. E à voie di vivi di optionals: e à doi celulârs, pal moment.

Mi plâs.

“Ce ti plasial di jê?”

Mi plâs dut: se e fos crote i lecarès dute la piel.

“Sêstu sporcacjon?”

Sporcacjon? Cui no lu saressial a viodi il mût che e cjamine?

“Âstu dome tal cjâf feminis?”

Sì!

I cjareçarès ducj i cjavei. Cuant che si môf e somee svolâ... e je une agane, une fade.

O lavori cun jê e a fuarce di vêle dongje mi soi afezionât.

E bute intor di se cuintâi di profum... profum... aphrodisiac!

Di astât o sintivi il so vêr odôr... la sô piel... la sô frescje nature...

Une gnot me soi insumiade. E veve une buse daûr de schene, te cjar vive. Come une sieradure. Jo i metei une clâf daûr de schene e je e tacà a movisi come chês pipinis dai carillons. E faseve dut ce che o volevi. Naturalmentri... dutis lis robis plui erotichis.

Mi plasarès pleâle pardabon a la mê volontât e no dome tai insiums.

Però... al è un però.

Jê mi à dit che o podaressin ancje viodisi: mi fasarès cognossi i siei amîs che a àn vincj agns mancûl di me e jo, ancje se come stîl o soi avonde moderni, o somearès *matusa* a lôr.

E di ce varessio di fevelâ? E je int cagone. A son di sigûr o borghês plens di TEDIUM VITÆ o fis di operaris che a àn comprât lis scarpis di gjinastiche di 200 euro (€).

Di ce aio di fevelâ? Dal ultin model di telefonut o dal Grant Fradi? Ce program chel... se o podarès...ta chê cjase i molarès il ZYKLON B tes conduturis di areazion.

Dulà vino di lâ? A cori ator par Vedinum?

Aio di instupidîle cu lis mêis ideis scuris?

Ce dolce che e je la sô vosute.

Une di i disei che e jere jê la mê pipine preferide. Jê mi disè che un so barbe, cuant che e jere piçule, i faseve chel biel zûc che a fasin i vielis ai frutins corint cul dêt tal palm de manute: e je une curte conte che cumò no mi visi... il cuninut... la suriute... il pradissit...

Sì, ancje se e je talianote e se e considere nô furlans come dai grês... e à vût un parint che i insegnave chês bielis storiis.

A sintî chê storie li jo... mi soi comovût...

O jerin a vore tal supermarcjât e, jessint insiemit tun spazi strent, o sin vignûts a contat. O

ai fat a pueste a cjalcjâ cu la mê spale chei tenars piruçs che e à devant e jê, in cambio, mi à dât une lizere muardude te schene. O jeri li li par rivâ a la estasi!

I ai domandât a Sonja ce che o vevi di fâ par conquistâ Sophia. Ve ca la rispueste di Sonja: “Niente. Non la conquisterai mai: è troppo diversa da te... è abituata a girare per le discoteche.”

di Checo Tam

#914